

Calënder de Gherdëina 2022

Nosc cumpani de scioh Franz Prinoth “de Stefun”

Nosc cumpani de scioh Franz Prinoth “de Stefun”, nasciù ai 29 de jené 1937, ie unì a mancë ai 17 de setëmbër, tl’età de 84 ani.

Franz fova tl 1959 un di cumëmbri fundadëures dla Lia dl Scioh Urtijëi (sën Lia Scioh Gherdëina) y ie restà pra si Lia nchin a si mort. Èl se à dat ju cun l juech dl scioh per bën passa 60 ani.

Franz ie stat l cumëmbër dla Lia dl Scioh Gherdëina, che per plu ani alalongia à jugà ativamente al scioh. Si partides ie documentedes dai prims ani sessanta dl secul passà. Drë’ tan documenteda ie si ultima partida jugheda tl 50ejem Campiunat Provinziel a scuadres 2018/19 tla serie B, ai 9 de fauré 2019.

Franz pössen, zënza pesimé, cunscidré na seva dl scioh te Gherdëina. Nuef iedesc, danter l 1960 y l 1975, se àl davanià l titul da campion de Gherdëina, y à pona danter i ani 1985 y 2016 jugà bën 117 partides per l Gherdëina l tla serie A provinziela, arjunjan de ndut 78 ponc y mez.

Si livel plu aut à Franz arjont ti ani ‘60 y ‘70 dl secul passà. Ntan chëi tèmps fova Franz un di jugadëures plu stersc dla region. Purtruep ne fòvel ntlëuta mo nia ponc Elo, che mesura la forza de juech de n jugadëur. Si Elo plu aut fova plu inant de 1.784 ponc, scebën che si livel de juech da dant ie da paredlé a chël de n jugadëur dal titul de Candidat Maester o monce Maester. Nce mo do l ann 2000 à Franz dat si cuntribut mpurtant al Gherdëina per vëncer cater di dejedot tituli da champions provinziei a scuadres.

Si stil de juech fova energich y posiziuonel, basà sun esperienza y n rajunamënt sot, ma nia perchël agressif. Èl cunesciova bën i “tlassics” y jugova d’uni sort de giaurides. Nchin al ultim à Franz for liet gën zaites de scioh, se mantenian nsci for nfirmà n con’ dl scioh mundiel.

Sciche pere de doi mutons, Jan Matie y Nicolette, y nëine de Christian y Johannes, fova èl scialdi bon de cunté ntraunides, avenimënc y fac da plu da giut, de gra nce a si bona memoria. L fova n plajëi a pudëi scuté su si adventures ntëur l scioh, ma nce de jì a crëp y sciche judacrëp, ne fajan mei mancë n fil de umorism. Drët avisa fova si cuntedes dla storia y dla politica de Urtijëi, ulache Franz ie per 20 ani, dal 1980 al 2000, stat cunselier de chemun, gran pert te listes de oposizion y per curt tèmپ nce assessëur. Sot fova si sentiment de iustizia per i dëibli y contra la duminanza dl pudëi tla man de puec, y grant fova l mpëni per la defendura de luech y natura.



Curs de scioh d'agost dl 2012.

De mestier fova Franz scultëur. Èl ne ova nia la síra de de gran davanies y bënsté, nce no do pudëi y suzes, ma bënsci se ralegròvel dla belèza dla natura ntëur nëus y l arlevé dl spirt-intelet sëura la cosses materieles.

Si spirt critic, deberieda cun umanità y fundamënt, l à caraterisà per duta si vita. Na crosa povester dura y grëuvia y si vista sota pudova fé crëier, a chiche ne l cunesciova nia bën, de avëi da nfé cun na persona ria da ti ruvé permez. Al'incontra fòvel na persona omla y de bon cuer, che se lasciova nce gën jì a n rì de cuer.

Franz à abù na vita rica de mudamënc, ulache l à pudù viver truep de bieì mumënc de gra a si familia y pascions, coche dit ntëur al scioh y al jì a crëp, y a si bona cundizion fisica. Purempò ne iel nia unì sparanià da n bur mel che ël à sapù purté y supurté te si ultims ani de vita, dajan nchin al ultim for da ntënder n cër otimism y crëta te na varijon.

Śën ie si troi sun chësta tiera stlut ju pazificamënter.

Franz, nosc bon cumpani de scioh, che te posses udëi inant cun ti uedl critic nosta partides, ma da n'otra dimenscion. Te mbincion che te posses paussé tla pesc eterna.

Rainer Demetz y Ruben Bernardi